

# Mo Pol Efesus la nai Elim Ginofe Faini

## Hwa buk enaig esog

Afa hwa bukna mog eba enaig esog God ognā mungwali gawig heven la nai i afa bitenai i Kraisna ningala fwaha sa ma Krais ehe mungwali enam misog feni (1:10). Afa God membeg heafna elim fuklasaniba sa ma ehgelni nofkikenag Sisas nai yi gabahla afuhnam afa mungu onigigna fi. Afa lasflam mingnag buk la Pol wasneigni sihig. Afa ehe enaig esog Godna esmunagim kwaganim eba mungwali el sa ma Sisasim olug onigini afa mungu finim afa mungu el apuke. Afa Sisasna suialag gafugag la God ati elim pese lambigim afa heafna sugwambug faig enag ogfug suialagim sa sihifwahag eba ehengelim nufunam pugunife (1:14). Afa ming mo Pol enaig sihifeg, Kristen el sama Sisas nai yi afofi afa mungu olug flinim afa Godna nihem patalfui. Hwa buk la Pol lasug mo sihig sama el Sisas Krais nai yi afonam asa mungu el lofug apukei. Afa ehe enaig sihifeg. Godna el eba mungu elig feg afa Krais eba enag eligni misog feg (4:1-16). Afa ming lasug mo enaig esog Kristen eba lalalofug feg afa Krais eba lalana wofugug feg (2:19-21). Afa Godna el ofenaiba angwafig mungufeg afa Krais ofenaiba enag angwafigni saglag (5:22-33). Afa hwa buk la bigelim ogfunig suialag gawig God membeg heafna elim esenigim.

**1** <sup>1</sup> Ka Pol ka Krais Sisasna kanog fwahag el afa God heafna membug la ehe kam kanogim afa sa kam kanog fwahag. Afa Efesus lanai el asa ne Sisas Krais nai yi lugwa ka nem hwa ginof fenig.

<sup>2</sup> Afa God bigelni Api afa Ainiyag Sisas Krais i sa ma nem esmunagim ahkwagani afa nem olug enesiegna sahfeni.

## Afa God bigelim Sisasna ninga la mungwali gawig faig

<sup>3</sup> Afa sa big Godna unehlagim fingi fi ehe God fegim afa Sisas Kraisna alag gafa feg afa Ainiyag Sisas Kraisna ehe bigim mungwali heven la nai gawig faigim afa enana bigelni sungwabugim kwaganig.

<sup>4</sup> Afa eba God maisim bite fakag fwainig fiahfenaba enanam God ati bigim Kraisna hefum kanog fwatina og eba sa big heafna nemug finim afa afsug kabag el fife afa mas big heafna nof la mangwal weti fi.

<sup>5</sup>Afa autunam ehe bigim membenim asa kanog fwatinam afa ogna Sisas Kraisna bigim pese tigfe lambigba asa big heafna luwalig fig. Afa heafna sawieg la enaigba eseg.

<sup>6</sup>Afa God heafna legim fwina membenam afa enaba ningihagba asa pe blog bigim lahanig. Eba ehe esmunagim bigim kwaganigba asa big Godna unehlagim fingi fi.

<sup>7</sup>Afa Krais bigim lahanigim asa heafna tafna bigim peseg lambigim afa bigna amtakwalig nihem hugflaitinig. Afa Godna kweafuag eba fwina kwania feg.

<sup>8</sup>Asa ehe bigim fwina nemug esenig. Afa ehe bigim suialag anwenag i afa onigig i faig.

<sup>9</sup>Afa autunam God ati sihi fwahana og sa ma Krais bigim eseni afa autunam enag sawieg meagam gofena afa glawaba bigim ambala upugunig.

<sup>10</sup>Afa enag sawiegba enaig eseg maia mungwa sufuni osuna feiba asa God mungwali gawig heven lanai afa bite lanai agoguliagenam Krais nai yi fwatiba asa ma Krais misog feni.

<sup>11</sup>Afa God heafna sawiegim patalkunaba eba ati autunam kagelim kanog fwatina kagelim og sa ma Krais nai yi muhla finim asa ma Godna el fi.

<sup>12</sup>Afa kagel Juda nai el ka gof gam Kraisim olug onigigim afa ehem patalfug. Afa God kagelim kanog fwatigba asa kagel enam anwenafi ehe kwania feg asa ka heafna unehlagim fingi fi.

<sup>13</sup>Afa nengel afwambanai el ena mona ne gafa ati ne nufunam mo higig, ena suialag moba eba God nem peseg lambig afa sa ne Sisas Kraisim olug oniginig eba sa ne Krais nai yi gabahla afohiefim. Afa God ehe autunam mo sihi fwahag eseg asa enam patalkugim afa nem heafna Sungwabug faig. Enaba ogfug ne heafna el nemug feasaieg.

<sup>14</sup>Afa autunam God heafna elim ati sihi fwahani og ka nem mangwal suialag faifi. Afa ati big Godna Sungwabugbi flig asa enaba ogfug nengigim ehe bigim mingnag gawigim gafa enaig esenifi. Asa big onigim ehe bigim wasneig gafugafenig asa big heafna unehlagim fingi fi.

### **Pol Godim sahna og ma Efesus la naim anwenag fai**

<sup>15-16</sup>Afa ka nem beten ofenbi ka nem wahkig oniginigim afa ka Godim suiala onag. Asa ka higigba nengel Ainiyag Sisasim nufunam olug onigig ne finig afa ne mungwali Godna elim membeg fegonig.

<sup>17</sup>Afa ka Godim beten enag bigelni Ainiyag Sisas Kraisna alag fegim afa eba kwania feg afa wasneigni feg sa ma ehe nem Sungwabug faibi asa ma enag nengelim suialag onigigim ofuni afa Godim ofuni asa ne ehem numwehe anwenafife.

<sup>18</sup>Afa ka sawi yi feg God sa ma nengelni onigigim obusenibi asa ne anwenafi ehe nem unetigigim asa nem mangwal suialag gawig sumi yi

flife. Afa mangwalim God sa heafna elim sihi fwahani eba suialag nemug feg.

<sup>19</sup>Afa enag wasneig sa God bigim kwaganigba eba fwinam kwania nemug fiahgeg afa mas big kwefihianagi enaig wasneigbi bigel nai yi go ambangel sa Sisasim olug oniginig.

<sup>20</sup>Afa enag wasneig gwenaig autunam God Kraisa nai yi ese fwahagba afa sa Kraisa lahaigba ena kwania wasneigni God ehem ilafog fatigim afa heven gam fuku wanikig nihiginai ninga la lasu fwahag.

<sup>21</sup>Asa enanai yi Kraisa mungwali haig haig wasneig sanel i, misog el i, gavman el i, afa bitenai ainiyag i enam sisi yi fenfe. Afa mungwali el unehlagna fig ehem ahnai skaufinig. Afa enaba glawo gohnanam afa nengigim gafa ehe misog fenfe.

<sup>22</sup>Afa God mungwali gawig lambina Kraisa skau sigofe afa sa Kraisa ehe mungwali gawig misog fenfe enaba siosim gafa gwenaig esenig ehe misog fenig.

<sup>23</sup>Afa siosba Kraisa elig feg afa enag elig misog la gabahlagba asa Kraisa eligim ihlafeageg. Afa Kraisa haig haigim mungwali ihlafenugeg.

### God Kraisa nofkenagag bigim melig pigieg elim faig

**2** <sup>1</sup>Afa autunam nengel ne haig haig nihe amtakwalig la afohieafnaba enaig nihe la nengelni sungwabug Godna nof la pigiafna.

<sup>2</sup>Afa enanam ne bitenai nihe amtakwalig la afwaminefifini afa ne sanelni misog elni nihem patalfuafena afa enag sanel glau enaig eseg elni onigigim wasneinugegba afa sa enaig el Godna mom flafug.

<sup>3</sup>Afa ilawonaba big mungwali gwenaig el finim afa bimbeafna sawieg la sahfewagfenaba eba big susug amtakwalig flite God ati mungwali elim faigim numweheageg fwahag.

<sup>4-5</sup>Enaba nufunam bimbeafna moala bigim pigie skofena. Afa maia enaig big finibi Godna aflafeg ihlafeagegim afa bigim fwinam membenigim asa Kraisa bigim esenigbi big nofkikenaba fig. Ei, God bigim esmunagim kwaganig asa nem peseg lambig.

<sup>6</sup>Eba ehe bigim Kraisa Sisasna ilafo klaitigba eba ati big Kraisa i heven la misog elni pegag sime la hawag.

<sup>7</sup>Afa God bigim membenigim asa bigim Sisasa Kraisa esmunagim kwaganig afa enag eba fwina kwania feagegim asa ehe ogna enam wahkig ogfuiag gofum.

<sup>8</sup>Afa Godna aflafeg munguhe ne Sisasim oniginigbi asa nem lambig. Enaba mangwal nimbe ne esih mo amo eba God ehe nem esmunagim faig.

<sup>9</sup>Afa mas amban heafna unehlagimba fingi fei, amo eba awai, asa hwaigba mango bimbeafna gafugag la puguia mo.

<sup>10</sup>Eba God bigim KraiS Sisasna esenigbi asa big enimuna el feasaigim afa big suialag mina afaia, enaigba God autunam ati numweheage fwahana.

### **Krais bigim esenigbi asa big mungu el feasaieg**

<sup>11</sup>Afa ne afwambanai el ne ati anwenafig Judanai el eba nihim kukohiawagig el fig afa ehengel nengelim enaig esogonig og nengel afwambanai elbi nihim kukohiawagig fwainig el ne fig. Afa enaig nihemba eba eligim mungu esig. Sa ne enam onigim autunam ati ne algana elbi afohieafena.

<sup>12</sup>Afa enanaba ne KraiS membi yi finim afa ne mas Israel elim fig mo afa negel mingnagim sa ne afwabagam fegonig afa ne mas God sa Israel elim mo sihi fwahani ne mas enanai yi saiweg mo. Afa ne mas Godim anwenafig mo afa ne Godim muhla fenagim nem mina awaienag.

<sup>13</sup>Afa autunamba ne membi yi nemug fini afa glawaba KraiSna tafna nem lamblugba asa ne KraiS Sisasna feasaiegim afa ne Godim muhla finig.

<sup>14</sup>Afa KraiS Ju el mi afa afwambanai el mi mungu wahe fwatigba asa big olug enesiegna suialag augufeg. Autunam Ju el i afa afwambanai el i angoluweg ahfena ofenaiba bog ehelim olyi gohunig. Afa KraiS heafna elig olyi kowagigim enana bogimba toflaitigim asa bigim lambigim mungu wahe fwatig.

<sup>15</sup>Afa KraiS Mosesna nihe mo mi afa Ju elni haig haig nihe mo mi enaba ati susuleg klaitig. Afa sambaganigi el sa ma mungu el feasainam afa mungu onigigna finim asa big olug enesiegna augufe.

<sup>16</sup>Afa ehengel angoluweg el ahfena afa KraiS li katigeg la lahagim asa ehengelnig olug kakagigim tigeflanig asa sambaganigi elim wahe fwatigba asa ehe bigim pese lambigim God nangum wankag.

<sup>17</sup>Afa ehe enaig esegim asa olug enesieg mo sihinugeg. Afa autunam ne afwambanai el Godim membi fini afa Ju el Godim muhla fini ehe enag suialag mo ehengelim sihinugena.

<sup>18</sup>Afa KraiS bigim sambaganigi elim mina piginigbi eba mungu Sungwabugni sa big Api nai yi apukeg.

### **Bigel mungwali kristenba Godna lala nemug**

<sup>19</sup>Afa autunam ne enmona angoluweg el fena afa glawaba mas ne enaig feg mo. Amo, eba ati ne Godna el i ahfegim afa ne Godna luwalig fig.

<sup>20</sup>Afa nengel eba lala lofug God nem nimblag fwahag afa kagel kanog fwatieg el afa Godna mo fli sihiafule elbi eba lala sumul lofug. Afa KraiS Sisas ehe eba lala goseg sumul feg.

<sup>21</sup>Afa enag lala eba KraiS ehe kike lambugu ena lalaba ehe ese fwahagba asa pugu kwaniafenam asa Godna kwania lala gohiba asa Ainiyag enanai yi gafife.

<sup>22</sup>Afa God nem mingnag el mi agogulig fwatigba asa ne Godna lala feasaig. Afa Godna Sungwabug enanai yi seifo gofufe.

### Pol afwambanai elim kwagana

**3** <sup>1</sup>Afa ka Pol ka Sisas Kraisna gafugag la ka nem afwambanai elim enag suialag mo sihianugegba asa ka kalabus yi go.

<sup>2</sup>Kog atiame ne higig God kam suiala fiaflagim asa kam enag gafugag faigba nengelim kwaganigim.

<sup>3</sup>Afa hwa mo sa God esegba eba autunamba meagam seifo gofena afa eba God heafa ehe kam ambala ogfunagba asa ka enam weti ginofe fwahana.

<sup>4</sup>Afa atiaba ne ena mom suwigigbi enag meaganai moba sa Kraisi eseageg enaba mangwal sa ka anwenafeg eba sa ne gafa anwenafife.

<sup>5</sup>Afa autunam sa fenaba enanamba God mas meaganai moba ambala upuguna mo amo eba awai eba glanuwo Godna Sungwabug ehe Godna afsug kanog fwatieg el mi afa Godna mo fli sihiafule el mi kam ambala upugunig.

<sup>6</sup>Afa enag meaganai moba enaig eseg. Afa Godna suialag mo la nengel enmona el mi afa Ju el mi bigim lambigim mungu wahe fwatigba big mungu elig fig afa mangwal gawig God Ju elim faig eba enmona elim gafa faig. Afa Sisas Kraisna gafugag la ehenigi Godna sihi fwahag mo ahflag.

<sup>7</sup>Afa God kam suialafiah flagim afa heafna wasneig kam esug faig asa ka heafna suialag mo sihiakag gafugag el pugug.

<sup>8</sup>Afa ka mungwali Godna elim ahnai skaufenig afa God ehe kam aflafenagim afa heafna suialag mo sihiakag gafugag kam faig. Afa kam og sa ma afwambanai elim ena mo fai. Afa ena moba Kraisna mungwali gawigim sihiageg afa bigel mas enam numwehe anwenafi.

<sup>9</sup>Afa ka enaig gafugag esegba asa mungwali el Godna onigigim numwehe anwenafi eba ilawanaba God mungwali gawig esegim afa heafna onigwageg meagam seifo gofena afa glawaba ka elim ogfunig.

<sup>10</sup>Afa autunamba meagam seifo gofena afa glawaba siosim esenigbi afa sios Godna haig haig suialag onigig i afa anwenag i ambala upukeminefenigbi og sa ma oflanai el wasneig elni afa sanelni misog elni enag Godna onigigim anwenafi.

<sup>11</sup>Afa autunam God ehe ati bigelni Ainiyag Sisas Kraisna enaig esegim onigiwage fwahana.

<sup>12</sup>Afa glawaba big Kraisim olug oniginig asa Kraisi ehe bigna minaba fenig God nagum apukegimba afa mas big embefi amo eba bigel ofenaiba luwal alagim asahna.

<sup>13</sup>Enaig esegba na sa ka nem sihinig nofe ne fwinam onigiwageaflafim kinig sa ka flag nem kwaganigim afa masa ese nengelni onigig tigeufefe. Afa ka enag kinig kahlagba eba ne Godna nof la suialag augufefe.

### Pol Efesus lanaim beteneni

<sup>14</sup>Afa enag mungwali God Api sa eseagegba ka enam onigigim afa ehem mong kokini kwakwagegim ehena unehlagim figifeg.

<sup>15</sup>Afa ehe mungwali elim heven lanai mi afa bite lanai mi mog fenig.

<sup>16</sup>Afa Godba suialag gawig memtog la puguiag nafeg asa ka enaig beteneg go kog Api sa ma nem heafna Sungwabug nengelni olug yi ihlafenugeiba sa ne enam fwinam wasnei yi.

<sup>17</sup>Afa ne Kraiss nai yi lugwafiba sa ma ehe nengelni olug yi gofi afa ka Godim enaig sahnafeg sa ma elim membenag nihe nengelni onigig la fwinam wasnei ofenaiba li bigag bitem kehlaguhba asa libi wasneig go.

<sup>18</sup>Afa nengel i afa Godna mungwali el i sa ne anwenag ihlafi afa Kraissna membenag nihem sa ne anwenafi enaba fwinam kwania feagegim gwesim mungwanam pekag, afa kukag afa mungwanam ikaminefeg.

<sup>19</sup>Afa ka membeg sa ne Godna membugum anwenafi afa mas big enam mungwali numwehe anwenafig mo. Asa ma God nem heafna nihem memtog la pugunugei.

<sup>20</sup>Afa Godna wasneig big nai yi gafugagfego eba mangwalim sa big sahig afa mangwalim sa big onigig enag gafugag Godna gwesim ihlafeg.

<sup>21</sup>Asa sios el Sisas Kraissim olug oniginig sa ma Godna unehlagim gwesim fingi feafufi. Eba nufunam.

### Bigel kristenba Kraissna elig

**4** <sup>1</sup>Ka Pol, ka Ainiyagna gafugag la ka kalabus yi go. Afa God nem sulufugim asa ne suialag gafugag fifie. Koka nem fuki lasaniba sa ne suialag nihena afohiafim asa enag gafugag la ne ihlafi.

<sup>2</sup>Afa sa ne mingnag Kristenim ahnai skaufegonim afa nihem aflahlanam fegon. Afa nofeka ikagna olug kakagiagi el sa nem haig fegonig. Afa sa ne mingnagim membegonim asa kwaganim.

<sup>3</sup>Afa Godna Sungwabug nengelim olug enesieгна auguiagim faig asa nengel mungu onigig nafig. Sa ne enaig esi el mas enag mungu onigigim amtakwalihiagi.

<sup>4</sup>Afa big ofenaiba mungu elig fig afa Godna Sungwabug eba mungu feg afa God bigim awamonigim asa big nengeafo mangwal mungu God bigim esenigim.

<sup>5</sup>Afa bigelni Ainiyag mungu feg afa olug onigig mungu feg afa bu la peg mungu feg.

<sup>6</sup>Afa God eba mungu feg afa ehe mungwali elni alag fegim afa Ainiyag feg. Afa ehe mungwali fenigim asa enanai yi seifo gafugafego.

<sup>7</sup>Afa Kraiss heafna sawieg la bigim mungwali mungu mungug wasneig esug faig asa big enana gafugafife.

<sup>8</sup>Afa Godna ginof enaig esog;

Afa maia ehe sisi gam fukwako fenaba

asa ehe angoluwag elim<sup>a</sup> filafe klaitigim sa wankag.

Afa ehe elim gawig esug faig.

*Sam 68:18*

<sup>9</sup>Afa enag mo enaig esog, “Ehe sisi gam fukwako” enaba mango maia?

Afa enag mo enaig ogfufeg ehe sisi nai fwahagim afa bite la pe blogim asa gwesim bite kife gam pekap.

<sup>10</sup>Afa ehe pe blogim afa sa enag el pese heven gam fukugum afa gwesim kwegfu kukag asa ehe mungwali gohminefe.

<sup>11</sup>Afa ehe enaig wasneig elim esug mimagenig asa mingnag elbi kanog fwatieg el fig afa mingnag Godna mo fli sihiafule el fig afa mingnag suialag mo sihigonug el fig afa mingnag siosna misog el fig afa mingnag ogfuiag el fig.

<sup>12</sup>Afa ehengel sa ma Godna elim kwaganigbi asa ma ehengel Godna gafugagim suialafefli. Eba sa Kraisma elig kwania fenam wasneiyagefe.

<sup>13</sup>Asa big mungu olug onigignafife afa Godna legim sa big anwenafig eba mungwalofufeg. Afa big saglag lofinim afa big gwenaig Kraisma i mungwalof ahfefe.

<sup>14</sup>Asa mas big luwal lofig mo. Afa haig haig mo amtakwalig mas bigim lambinam ofenaiba bufle buskom esim esim lambfiegofi afa efef li figegim petla faka lambfiegofi. Afa mwakwal el eba haig haig mina feagegim elim mwakwahiagig oga elim amtakwalig mina wanafu.

<sup>15</sup>Afa big mas enaigba fi, amo sa big elim membegonim afa nufunam mo sihigonfim eba mohna feskofenam ihlafesaife asa big Kraisma i mungwalofug ahfenam afa ehe bigelni misog fenfie.

<sup>16</sup>Afa maia big elig ehem ahnai skaufinigi asa ninga i, mong i, nofug i afa angug i enag elig yi tutufeakagba asa bigag ehem kike lambugu. Afa maia enag mungu mungug heafgelni gafugag fiahgofibi asa elig mohna fegim afa membug nihe fwina wasneig.

### **Bigel sa big ombusug yi nai fi**

<sup>17</sup>Afa Ainiyagna unehlag la ka nem wasneig mo faig nofeka afwambanai el lofug afohiefigim. Afa ehengelni onigig mas mog fenig mo.

<sup>18</sup>Afa ehengel ati etetiagigim afa olug liputie skofeg asa ehengel Godna nofkenagagim membi fenig. Afa ehengelni onigig sikulu feskofeg.

<sup>19</sup>Afa ehengelni onigig mas afwane feskofei afa ehe amtakwaligim sifkalinig hefum gwesim mungwali faig afa sa haig haig eseagig.

<sup>20</sup>Afa ati ka nem ogfunig enag amtakwalig mina eba mango Kraisma mina mo.

<sup>21</sup>Afa ka nengelim ehena nufunam mo ogfunig asa ati ne Siasna mom higigim patalfug.

<sup>a</sup> 4:8 Autunam bigel Godna angoluwag el fini asa Kraisma bigim pese lambigim.

<sup>22</sup>Afa maia ne Sisasim olug onigig fwainig afohiafnaba afa enanaba ne autunai nofkenagag la afohiafna. Afa ne ati higig autunai nihe nimbeafgelni autunai nofkenagag la sa go enag nihe nem mwakwalen go eba enaho autunai nofkenagagim amtakwalefugu afa sa ne enam huguflifati.

<sup>23</sup>Afa nengelni olug i afa onigig i sa ma waikefe mulug nemug pugui.

<sup>24</sup>Afa sa ne glaunai nihem flifatinim. Afa enaba God ehe lofug feg eba suialafegim afsug nemug feg.

<sup>25</sup>Afa big mungwali Kraisna elig fig asa nofeka mwakwal mo sihiagi afa sa ne mungwali nimbeafgelni hihem nufunam mo sihigonugifim.

<sup>26</sup>Afa ne olug kakagig onigig figbi nofeka enam gwese fwaha eba masa ne amtakwalig eseagefe. Afa masa osu pefiba afa ne gwese enam kehlagufufe.

<sup>27</sup>Masa ne Satanim mina pigi fwahafe.

<sup>28</sup>Afa ukwef el sa enaig nihem fwahinim asa heafna ningana suialag gafugag fiahginim sa ma gawig fwainig elim kwagani.

<sup>29</sup>Nofeka amtakwalig mom sihiagi amo sa ne suialag mo sihiage eba sa elim kwagani. Afa mo sa ne sihig enaba elim suiala fenagba asa el ena mo higig.

<sup>30</sup>Nofeka Godna Sungwabugim olug kinig faim. Afa enag Sungwabugbi ofug ati big Godna fig asa autunai la God bigim lambinam amtakwalig fwainig la lasanife.

<sup>31</sup>Afa ne elim amtakwalig onigig nihe afa olug kakageg nihe afa ninimu nihe sa ne gwesim fati. Nofeka elim fwina lagigonim afa kwasigonim. Afa haig haig amtakwalig onigigim sa ne fwatiagi.

<sup>32</sup>Afa nengelni nihe eba sa ma sios nilitem aflafegonim afa suialafegonugi. Afa Krais enaig esegba asa God bigelni amtakwalig huguflafatinig asa bigel nilitem gwenag esegon.

### Sa big ombusug yi afohieffim

**5** <sup>1</sup>Afa ati ne Godna luwalig figba afa ehe nem fwina membenig asa ne gwenag ehe lofug esi.

<sup>2</sup>Krais bigim membenigim asa bigim lahanig. Afa enag lahad ofenaiba pris sanda Godim tuhlunigbi asa suialag emblegusug pugugba asa God enam sifakalenag. Asa nengel gafa gwenag membug nihe la afohieffim.

<sup>3</sup>Afa nengelbi Godna el ne fig asa nofene aga taitufi afa haig haigim membehiagi afa elni gawigim membe gonigigim esi. Afa sonaig mo masa nem olyi pugunifie.

<sup>4</sup>Afa mingnag mo nofeka enaig esi eba afwanef mo afa haisihi haisihi mo afa molamp mo. Amo, sa ne Godim suialag ona.

<sup>5</sup>Afa enam sa ne numwehe anwenafi aga taitu el i afa haig hiag membeheawagig el i afa elni gawigim membenag el i eba mas Krais nai



yi God nai yi bog meg gam afu saigo. Afa el fwina gawigim membeageg enaig elbi eba ehe mwakwal godim lotu fenig.

<sup>6</sup>Afa el Godim masig fatinagim afa enaig nihem patalkuba asa God enaig elim olug kakageni. Masa el mwakwal mona nem kilmwan fegonifi.

<sup>7</sup>Asa ne enaig elim membi fegon.

<sup>8</sup>Afa autunam ati ne sikulufeg la afofena. Afa maia ne Ainiyagna el figbi asa ne ombusug yi afohie. Afa sa ne ombusug elni nihem afohiefigim.

<sup>9</sup>Afa ombusug nihe eba haig haig suialag nihe i afa afsug nihe i afa nufunam nihe i lampugug.

<sup>10</sup>Sa ne enam numwehe yisginim anwenafi mangwal nihe sa God nem og ese.

<sup>11</sup>Afa sa ne sikulufeg nihem membi feni eba mas haig esenam afa fug lugui. Afa sa ne enag nihe ambala lamblu ombusug yi fwati.

<sup>12</sup>Afa el haig haig meagam eseagig eba fwinaf awanefeg asa ka enam sihiagim oksig.

<sup>13</sup>Afa maia ombusug mungwali nihem pugunigbi asa enag numwehe ambala afohie asa amtakwalig elim afwanfug flig.

<sup>14</sup>Afa mangwal sa ambala afohie enag gafa ati ombusug yi afohie. Asa mingnag mo enaig esog og;

El sa ne nongi sa buihia

afa nimbeafna biteg kife nai sa ne buihiaiba

sa ma Kraisma ombusug ne nai yi fenai.

<sup>15</sup>Asa ne numwehe nimbeafna gagim onigim. Nofeka etetig el lofe amo, sa ne suialag onigina el fe.

<sup>16</sup>Afa hwag osuna eba el amtakwalig fig asa nofeka suialag nihem yiskose.

<sup>17</sup>Nofeka ne etetig el fi. Sa ne enam numwehe yisginim anwenafi mangwal nihe sa God nem og ese.

<sup>18</sup>Afa nofeka uflogna bu fwinaf ahganam afa moiniaini feagi amo, enaba nem amtakwalig laitig. Afa sa ne Godna Sungwabugim fwahinibi sa ma nem blo ihlafenugei.

<sup>19</sup>Sa ne Kristen elim enaig mo sihigonugi enaba Godna buk la nai mwanafi afa siosna mwanafi, afa mwanafi Godna Sungwabug nem faig. Afa nimbeafna onigig Ainiyag nai yi lugwafiba asa mwanafi mo fatini ehena unehlagim fingi figim.

<sup>20</sup>Afa bigelni Ainiyag Sisas Kraisma unehlag la sa ne mungwali haig haigim God Apiim suialag ona.

### Alagag angwagna mo

<sup>21</sup>Afa nengel Kraisma oniginim patalfu asa nembeafum mungwali ahnai skaufiagi.

<sup>22</sup>Afa nengel angwafig sa ne Ainiyagim ahnai skaufenag asa nimbeafna alagagim gwenag esena.

<sup>23</sup>Afa alagag heafna angwagim gosenag ofenaiba Kraiss heafna elim gosenig. Heafna el eba heafna elig asa ehe enag elim pese lambig.

<sup>24</sup>Afa sios el sa Kraissim ahnai skaufini asa angwafig gafa nimbeafna saglagim mungwali ahnai skaufena.

<sup>25</sup>Afa nengel saglag sa ne nimbeafna angwag nai yi onigig lugwafim ofenaiba Kraiss sios nai yi onigig lugwanim asa siosim lahanig.

<sup>26</sup>Afa ehe enaig esegba og sa ma sios afsug nemug fei. Na sa heafna suialag mo ofenaiba bu lofug enag elim gigiafenig.

<sup>27</sup>Asa sios Kraissna nof la suialag nemug afofi. Eba mas nihgug ge skofei afa elig hiasafei eba mangwal feg fwainig afa eba afsug feg afa haiseg fwainig.

<sup>28</sup>Afa sa saglag heafgelni eligim afafkig fiahflag asa ne nimbeafgelni angwafigim gwenaig esegon. Afa saglag heafna angwagim fwina membenag eba hefum gafa gwenaig eseg.

<sup>29</sup>Afa mas amban heafna eligim amtakwal fiahflai amo, eba el heafna eligim fane lahigim afa suialafiahflag. Afa enaig membug nihe esegba eba mungwalofug Kraiss siosim gwenaig esenig.

<sup>30</sup>Afa bigel eba heafna elig fig.

<sup>31</sup>Afa Godna ginof ena mom enaig esog, “Afa saglag heafna alag afagim fwahagim asa heafna angwagim pahlag gu afa sambaganigi eba mungu elig ahfeg.”

<sup>32</sup>Afa enag mo eba mungwanam pekag. Afa ka enag mom enaig onigig feg eba Kraiss mi sios mi ofug. <sup>33</sup>Afa enag mo nengelim gafa sihinig sa ma mungwali saglag heafgelni angwafigim fwina membegoni asa hefum membig. Afa sa mungwali angwafig heafgelni alagagim ahnai skaufegonig.

### Alag i afag i afa luwal ehengelni mo

**6** <sup>1</sup>Afa nengel luwal ati ne Ainiyagim onigig sa ne nimbeafgelni alag nai yi afag nai yi mom higigon eba enaig ne esigbi eba suialag nihe feg.

<sup>2</sup>Afa Godna ginof enaig esog, “Sa ne alag mi afag mi ahnai skaufegon.” Afa enag nihe mo eba gof lanai nihe mo mo sihi fwahag mi waheg.

<sup>3</sup>Afa enag mo sihi fwahag waheg mo enaig esog, eba ne enaig esegba “asa ne mungwali nem suialag pugufenafe afa eba ne hwa bite la numwehe gafe.”

<sup>4</sup>Afa ne alag nofeka luwalna onigigim haig esena eba masa luwalna onigig amtakwalefe. Amo, sa ne luwalim numweh lambfinim Ainiyagna minam ofugon fufum afa maia ha mina afu ofefiba asa ne pese hugfu wanambe.

### Esug gafugag el nai yi afa misog el nai yi mo

<sup>5</sup>Afa nengel esug gafugag el sa ne nimbeafgelni bite nai misog elim ahnai skaufenim asa ehengelni mo higinim patalfu. Afa enag gafugagim numwehe oniginim asa ofenaiba ne Kraissim esofini.

<sup>6</sup>Afa nofeka enaig ese maia misog el nem nofna nangwagofiba ena mo ne og ehe kam sifkalenai afa maia nem nangwag fwainig fegba ena mo ne fwahag. Amo, nofeka enaig ese. Sa ne Godim numwehe oniginam afa heafna sawieg la ese asa Kraisna esug gafugag el ne fi.

<sup>7</sup>Sa ne numwehe wasneig gafugafinim afa enaig esego kaba mango elim gafugafinim mo amo eba awai ka Ainiyagim esenig.

<sup>8</sup>Sa ne enaig anwenafi haig suialag gafugag el sa esig eba Ainiyag ehem mungwag faifi. Afa ehe mungwali elim enaig esenifi, misog el mi afa esug gafugag el mi gwenai esenifi.

<sup>9</sup>Afa nengel misog el sa ne enaig onigig flinim afa nimbeafgeli esug gafugag elim gwenai esegon. Nofeka wasneig mo ehengelim sihin asa ehe embefiagifi. Afa ati ne anwenaifig nengel nai yi afa esug gafugag el naiyi misog elbi eba heven la ga. Afa ehe mungwali elim mungwa mina kwefihiageg.

### **Sa big wasneig afohnam fagiule el lofi**

<sup>10</sup>Afa hwag sumi yi mo ka ginofeg. Afa sa ne Ainiyag i ahgofiba asa ne heafna kigmog la wasneig goh.

<sup>11</sup>Afa hagigna wag God nem lambwaieg sa ne aitiaginim asa ne wasneig afohnam afa Satanna hagig onigigim nem mas pigaupi.

<sup>12</sup>Afa bigelni enag hagig eba mango bite nai el i big hag goh mo. Amo, eba oflanai sanel amtakwalig afa heafgelni misog el i enag big ehengel i hag go. Afa ilawo eba sikulufegba asa nimbasa bite mi afa of mi nangwagihagego asa big ehengelim gwenai esegonug.

<sup>13</sup>Afa mungwali Godna hagigna wag sa ne aitiagi. Afa maia amtakwalig osuna puguiba asa ne wasneig gohnam hagofum. Afa maia hagig awaieba sa ne gwese gofum.

<sup>14</sup>Afa sa ne numwehiaginim wasneig afohnam asa nufuna mo nengelni onigig la gofi ofenaiba let engmog la kigi fwahag. Afa afsug nihe nem gohnai ofenaiba minailof fati fwahag.

<sup>15</sup>Afa ne suialag mo sihiagim numwehiagenam gofum ena ofenaiba mong lofug ne fati gu. Afa enag suialag mo enaig esog God ati bigim lambigba asa big olug enesieg nafig.

<sup>16</sup>Afa sa Godim olug oniginag fwina kehla gufum ofenaiba fagiule el mengig kikiseg tof flaugu enaba mungwali gigafeg lambugu. Afa Satan suwi fagna nem pifigba asa enanai yi blo heugu fatigim mungweg.

<sup>17</sup>Afa God nem pese lambig afa sa ne enag onigig kehla gufum ofenaiba wasneig hat misogim kagfugu. Afa sa ne Godna mo flag eba ofenaiba pina Godna Sungwabug nem faig.

<sup>18</sup>Afa Godna Sungwabugni wasnei yi sa ne wahkig haig haig beten feafufum. Asa numwehe nofiagefiba masa ne yiskosefe. Afa wahkig sa ne mungwali Godna elim beten fegon.

<sup>19</sup>Afa sa ne kam gafa beten fini afa maia ka mo osihifiba sa ma God kam mo fainam afa kam kweagfuiba eba ka mas embefe. Afa suialag mo autunam meagam sefugofena eba ka ambala enam sihife.

<sup>20</sup>Afa God kam heafna suialag mo sihiagim ningihiagba asa glau ka kalabus yi go. Asa ne kam betenegonibi ka Godna suialag mo sihibi sa ma ambala puguiba eba Godna membug la ka eseg.

#### **Polna fwahiag mo**

<sup>21-22</sup>Afa bigelni suialag nilite Tikikus afa Ainiyagna gafugagim ehe suialag gafugag el feg. Afa ka ehem nengel nangum ningihiafe sa ma blo ehe kana mom nem sihini asa ne anwenafig ka haig gafeg. Afa ehe nengelni olugim wasneini.

<sup>23</sup>Afa God Api i afa Ainiyag Sisas Krai i sa ma mungwali kristen nilitem olug enesieg ahfai afa ehengelni olug onigig i afa membug nihe i sa ma wasnei. <sup>24</sup>Afa mungwali el Ainiyag Sisas Krai nai yi onigig wahkig lugwafi sa ma God ehengelim esug kwagani.